

四庫全書

集部

欽定四庫全書

集部

晦庵集卷一百

詳校官庶吉士 臣朱理

主事 臣呂雲棟覆勘

總校官庶吉士 臣倉聖脉

校對官中書 臣朱炘

謄錄貢生 臣陳昌敬

欽定四庫全書

晦庵集卷一百

宋 朱子 撰

公移

州縣官牒

恭惟朝廷設官分職等級分明大小相維各有承屬蓋以一人之智不能遍周衆事所以建立司存使相摠攝然事有統紀雖繁而不亂今觀本州官屬雖具而從來分職未明文書散漫殊無條理財賦獄訟盡出更手而

叅佐以下官受其成詳考舊案亦有不經通判書押處  
大綱一紊衆目立隳若不更張積成深弊今來須至別  
行措置如前所陳又仰諸案呈覆已得判押並須以次  
經由通判職官簽押方得行遣文字並須先經職官次  
詣通判方得呈知州取押用印行下又準淳熙令諸縣  
丞簿尉並日赴長官廳或都廳簽書當日文書謂應行  
出者  
竊詳立法之意蓋欲一縣之官同管一縣之事庶得商  
量詳審與決公事不至留滯民無冤枉而比年以來此

法不舉所謂過廳者不過茶湯相揖而退其於縣之財賦獄訟知縣既不謀之佐官佐官亦不請於知縣大率一出於知縣一人十數胥吏之手而已設使知縣才術過人力能獨任亦非為治之體而況為知縣者有不得人或見事有不明處事有不公則賕賂囑託變亂是非淹延囚係違法害民其弊又有不可勝言者今請諸縣知佐詳照條法逐日聚廳議事應授接詞訴理斷公事催督財賦並要公共商量簽押圓備然後施行庶幾上

合法意下慰民情稍革舊弊都吏具檢牒通判廳遍下  
簽廳及諸曹官自五月一日為始依此施行更有未盡  
事理委自逐官比類推究申請施行最後一項仍帖諸  
縣請各關牒佐司同共遵守先具各知稟狀申

漳州曉諭詞訟榜

權發遣軍州事

契勘本州近準提刑行司判下詞狀計二百四十三  
道其間官吏違法擾民事理彰著者即已遵依送獄

根治其有關係一方百姓公共利害而非一旦所能  
遽革者亦已廣行咨詢別行措置訖其餘詞狀亦有  
只是一時爭競些少錢米田宅以致互相誣賴結成  
仇讐遂失鄰里之驩且虧廉耻之節甚則忘骨肉之  
恩又甚則犯尊卑之分細民如此已足傷嗟間有自  
稱進士學生宦族子弟而其所訴亦不免此此邦之  
俗舊稱醇厚一旦下衰至於如此長民者安得不任  
其責又何忍一切徒以柱後惠文為事而不深求所

以感發其善心者哉又況所論或人數衆多或地里  
遙遠或事非干已而出於把持告訐之私或詞涉虛  
妄而肆為詭名匿迹之計前此未知情由便行追對  
及至得實善良被擾已不勝言慮之不深徒自悔咎  
今已刷出所承判狀委官置籍先索案祖逐旋看詳  
然後逐人引問供對庶幾深審得見實情予奪之間  
不至差誤若有姦偽先將詞人重行斷遣務以上奉  
公法下全私恩不擾良民不長姦惡此病守區區深憂



吾民追懷舊俗之本志也將來斷訖各給斷由回申  
照會然後逐件勾銷元籍如未允當即仰人戶自從  
次第官司翻論今恐詞人等等候日久未有施行妄  
有疑惑復生詞訴除已具申提刑司外須至曉諭者  
右今榜州門張掛曉諭各令知悉更請深自思惟所訴  
事理或涉虛偽或無大段利害可以平和即仰早生悔  
悟降心相從兩下商量出官對定庶幾有以復此邦忠  
厚醇朴之俗革比年頑嚚偷薄之風少安病守憫惻慚

懼之心仰副明使者循行荒遠宣布詔條之意如未聽  
信別聽指揮儻觸憲章決無輕恕故榜紹熙元年五月  
日

曉諭居喪持服遵禮律事

使州

今月初九日有進士呂渭夫狀陳理差役公事狀有  
稱見居母喪而身著欄幘皂紗巾持卽已開陳禮法  
當廳告戒尚慮遠近未能遍知須至曉諭

右當職竊聞先聖有言孝子之喪親服美不安聞樂不  
樂食旨不甘此哀戚之情也又曰子生三年然後免於  
父母之懷故三年之喪天下之通喪也予也有三年之  
愛於其父母乎是以昔者先王制為喪禮因人之情而  
節文之其居處衣服飲食之間皆有定制降及中世乃  
有墨衰之文則已不能無失於先王之意矣然准律文  
諸喪制未終釋服從吉若忘哀作樂自作遣人等徒三年雜  
戲徒一年即遇樂而聽及參預吉席者各杖一百則是

世無古今俗無厚薄而有國家者所以防範品節之意  
尚未泯也又况頃年至尊壽皇聖帝躬服高宗皇帝之  
喪素衣素冠皆用麤布當職嘗因奏事親得瞻仰恭惟  
天子之孝所以感神明而刑四海者如此其盛而此邦  
僻遠聲教未洽乃有居父母之喪而全釋衰裳盡用吉  
服者見之駭然良用悲歎自惟涼薄無以瘡入然幸身  
際盛時目覩聖孝今又得蒙誤恩使以承流宣化為職  
敢不明布以喻士民自今以來有居父母之喪者雖或

未能盡遵古制全不出入亦須服麤布黻衫麤布黻巾  
繫麻經著布鞋不飲酒不食肉不入房室如是三年庶  
幾少報勛勞勉遵禮律仰承聖化如其不然國有常憲  
今榜曉諭各令知悉故榜紹熙元年六月日

勸女道還俗榜

使州

契勘本州日前官司失於覺察民間多有違法私創  
庵舍又多為女道住持昨來當職到任之初為見事

有非便即已坐條出榜禁止今後不得私創庵舍居住  
丁寧告戒非不嚴切近日因引詞狀見得尚有女  
道住庵又有被人論訴與人姦通者顯是不遵當職  
約束故違國家條制誣上行私敗亂風俗須至再行  
勸諭者

右今榜勸諭本州軍民男女等蓋聞人之大倫夫婦居  
一三綱之首理不可廢是以先王之世男各有分女各  
有歸有媒有娉以相配偶是以男正乎外女正乎內身

脩家齊風俗嚴整嗣續分明人心和平百物順治降及後世禮教不明佛法魔宗乘間竊發唱為邪說惑亂人心使人男大不婚女長不嫁謂之出家脩道妄希來生福報若使舉世之人盡從其說則不過百年便無人種天地之間莽為禽獸之區而父子之親君臣之義有國家者所以維持綱紀之具皆無所施矣幸而從之者少彙倫得不殄滅其從之者又皆庸下之流雖感其言而不能通其意雖悅其名而不能踐其實血氣既盛情實

日開中雖悔於出家外又慚於還俗於是不婚之男無不盜人之妻不嫁之女無不肆為淫行官司縱而不問則風俗日敗悉繩以法則犯者已多是雖其人不能自謀輕信邪說以至於此亦其父母不能為其兒女計慮久遠之罪究觀本末情實可哀此當職前日之榜所以不憚於丁寧也然昨來告戒未行只緣區處未廣今復詳思與其使之存女道之名以歸父母兄弟之家亦是未為了當終久未免悔吝豈若使其年齒尚少容貌未



哀者各歸本家聽從尊長之命公行媒娉從便婚嫁以復先王禮義之教以遵人道性情之常息魔佛之妖言革淫亂之汚俗豈不美哉如云婚嫁必有聘定賫送之費則脩道亦有庵舍衣鉢之資為父母者隨家豐儉移此為彼亦何不可豈可私憂過計苟徇目前而使其男女孤單愁苦無所依託以陷邪僻之行鞭撻之刑哉凡我長幼悉聽此言反復深思無貽後悔故榜紹熙元年

八月日

揭示古靈先生勸諭文

古靈先生陳公勸諭為吾民者父義

能正其家

兄友

能養其弟

弟

敬

能敬其兄

子孝

能事父母

夫婦有恩

貧窮相守為恩若棄妻不養夫喪改嫁皆是無恩也

男女有別

男有婦女有夫分別不亂

子弟有學

能知禮義廉耻

鄉閭有禮

歲時

寒暄皆以恩意往來燕飲序老少坐立拜起

貧窮患難親戚相救

借貸婚娶財穀

死喪隣保相助無墮農桑無作盜賊無學賭博無好爭

訟無以惡凌善無以富吞貧行者遜路

少避長賤避貴輕避重去避來

耕者遜畔

地有畔不相爭奪

班白者不負戴於道路

子弟負重執役不令

老者擔擎則為禮義之俗矣

以上同保之人今仰互相勸戒孝順父母恭敬長上  
和睦宗姻周卹鄰里各依本分脩本業莫作姦盜莫  
縱飲博莫相關打莫相論訴莫相侵奪莫相瞞昧愛  
身忍事畏懼王法保內如有孝子順孫義夫節婦事  
跡顯著即仰具申當依條旌賞其不率教者亦仰申  
舉依法究治自餘禁約事件仍已別作施行各宜遵  
守毋至違犯

勸諭榜

今具節次施行勸諭事目如後

- 一勸諭保伍互相勸戒事件仰同保人互相勸戒孝  
順父母恭敬長上和睦宗姻周卹鄰里各依本分  
各脩本業莫作姦盜莫縱飲博莫相鬪打莫相論  
訴孝子順孫義夫節婦事跡顯著即仰具申當依  
條格旌賞其不率教者亦仰申舉依法究治
- 一禁約保伍互相糾察事件常切停水防火常切覺

察盜賊常切禁止鬪爭不得販賣私鹽不得宰殺  
耕牛不得賭博財物不得傳習魔教保內之人互  
相覺察知而不糾併行坐罪

一勸諭士民當知此身本出於父母而兄弟同出於  
父母是以父母兄弟天性之恩至深至重而人之  
所以愛親敬長者皆生於本心之自然不是強為  
無有窮盡今乃有人不孝不弟於父母則輒違教  
命敢闕供承於兄弟則輕肆忿爭忍相拒絕逆天

悖理良可歎傷宜亟自新毋速大戾

一勸諭士民當知夫婦婚姻人倫之首媒妁聘問禮律甚嚴而此邦之俗有所謂管顧者則本非妻妾而公然同室有所謂逃叛者則不待媒娉而潛相奔誘犯禮違法莫甚於斯宜亟自新毋陷刑辟

一勸諭士民鄉黨族姻所宜親睦或有小忿宜各深思更且委曲調和未可容易論訴蓋得理亦須傷財廢業况無理不免坐罪遭刑終必有凶切當痛

戒

一勸諭官戶既稱仕宦之家即與凡民有異尤當安分循理務在克己利人又况鄉鄰無非親舊豈可恃強凌弱以富吞貧盛衰循環所宜深念

一勸諭遭喪之家及時安葬不得停喪在家及攢寄寺院其有日前停寄棺柩灰函並限一月安葬切不可須齋僧供佛廣設威儀但只隨家豐儉早令亡人入土如違依條科杖一百官員不得注官士人

不得應舉鄉里親知來相弔送但可協力資助不  
當責其供備飲食

一勸諭男女不得以修道為名私創庵宇若有如此  
之人各仰及時婚嫁

一約束寺院民間不得以禮佛傳經為名聚集男女  
晝夜混雜

一約束城市鄉村不得以禳災祈福為名飲掠錢物  
裝弄傀儡



前件勸諭只願民間各識道理自做好人自知不犯有  
司刑憲無緣相及切須遵守用保平和如不聽從尚敢  
干犯國有明法吏不敢私宜各深思無貽後悔

曉示經界差甲頭榜

漳州

契勘本縣日前經界未及均稅遽行住罷後來一向不  
復舉行是以豪家大姓有力之家包併民田而不受產  
則其產虛樁在無業之家冒占官地而紐租則其租俵

寄於不佃之戶姦胥猾吏夤緣作弊走弄出入不可稽考貧民下戶枉被追呼監繫箠楚無所告訴至於官司財計因此失陷則又巧為名色以取於民雖有慈惠之長明察之官欲革舊弊而一新之亦復無所措手如是者蓋已有年矣乃者聖明灼知其弊深加憐憫特詔守臣相度經界利害蓋欲仰遵紹興已行之故典加惠此邦重困之瘼民務使田稅均平貧富得實免致貧民下戶困於兼并豪猾之手雖知應役之人不無少擾然欲

革百年深錮之弊為斯民久遠之計勢有不得已者本  
州謹已仰體聖意條具奏聞去訖竊恐旦夕或蒙行下  
便當舉行而遠近士民傳聞不審過有疑慮合行曉諭  
及有預行撥置事件亦須先次遍行告報曉示下項

一今來經界乃是紹興年中已行之法當時諸路州  
縣並皆舉行始初傳聞人亦驚恐扇搖眩惑怨謗  
紛然及至打量田土攢造圖帳一都不過二十餘  
人遠者不過數月之久即便結局應役之戶雖不

免有勞費然結局之後田土狹濶產錢重輕條理  
粲然各有歸著在民無業去產存之弊在官無逃  
亡倚閣之欠豪家大姓不容僥倖隱瞞貧民下戶  
不至偏受苦楚至今四五十年人無智愚皆知經  
界之為利而不以為害只是本州推行未畢遽行  
住罷所以民間但知其害而未及知其利之如此  
奸民猾吏又皆知其利於貧民而不利於已往往  
互相驚恐妄說事端欲使聖朝仁政實惠不得下

流而千里之內貧弱之民依前受弊無有窮極實  
可憐悼今仰人戶詳此事理仰體聖朝寬恤之意  
莫聽浮言妄有驚擾

一經界之法當依紹興年例別差大小正副甲頭專  
一打量每都大約不過二三十戶本州諸縣從來  
本都不曾分十大保無以得見都分濶狹合差小  
甲頭之數今且行下諸縣仰各告報見役保正副  
等先納逐都四至之內圍徑幾里

東至西幾里  
南至北幾里

約

計田園大槩頃畝

大槩約度未要的實細數

具狀申縣以憑分

畫方界定差大小甲頭將來定差之後打量攢造並委甲頭管幹其見役保正若非合充甲頭之人即依舊只管煙火不預經界事務

一打量紐算置立土封椿標界至分方造帳畫魚鱗圖砧基簿及供報官司文字應干式樣見已講究見得次第旦夕當行鏤版散下諸縣庶幾將來經界大小甲頭等人各通曉免至臨時雇募他人重

有所費

右今榜先次曉諭本州人戶各仰知悉如將來所奏事  
理得蒙聖恩即賜開允即當別行措置子細曉諭務要  
不擾而辦以副朝廷綏靖遠方蠲除民瘼之意如所措  
置有未穩便亦仰及早前來陳說切待別行講究改正  
施行紹熙元年八月日

勸農文

契勤生民之本足食為先是以國家務農重穀使凡州

縣守倅皆以勸農為職每歲二月載酒出郊延見父老  
喻以課督子弟竭力耕田之意蓋欲吾民衣食足而知  
榮辱倉廩實而知禮節以共趨於富庶仁壽之域德至  
渥也當職幸來此承攝敢墜彝章今有勸諭事件開具  
如後

一今來春氣已中土膏脈起正是耕農時節不可遲  
緩仰諸父老教訓子弟遞相勸率浸種下秧深耕  
淺種趨時早者所得亦早用力多者所收亦多無



致因循自取飢餓

一陂塘水利農事之本今仰同用水人協力興修取  
令多蓄水泉準備將來灌溉如事干衆即時聞官  
糾率人功借貸錢本日下修築不容誤事

一耘犂之功全藉牛力切須照管及時餵飼不得輒  
行宰殺致妨農務如有違戾準勅科決脊杖二十  
每頭追賞五十貫文錮身監納的無輕恕今仰人  
戶遞相告戒毋致違犯

一種田固是本業然粟豆麻麥菜蔬茄芋之屬亦是可食之物若能種植青黃未交得以接濟不為無補今仰人戶更以餘力廣行栽種

一蠶桑之務亦是本業而本州從來不宜桑柘蓋緣民間種不得法令仰人戶常於冬月多往外路買置桑栽相地之宜逐根相去一二丈間深開窠窟多用糞壤試行栽種待其稍長即與削去細碎拳曲枝條數年之後必見其利如未能然更加多種

吉貝麻苧亦可供備衣著免被寒凍

一鄉村小民其間多是無田之家須就田主討田耕作每至耕種耘田時節又就田主先借穀米及至終冬成熟方始一併填還佃戶既賴田主給佃先借以養活家口田主亦藉佃客耕田納租以供贍家計二者相須方能存立今仰人戶遞相告戒佃戶不可侵犯田主田主不可撓虐佃戶如當耕牛車水之時仰田主依常年例應副穀米秋冬收成之

後仰佃戶各備所借本息填還其間若有負頑不還之人仰田主經官陳論當為監納以警頑慢

一本州管內荒田頗多蓋緣官司有依寄之擾象獸有踏食之患是致人戶不敢開墾今來朝廷推行經界向去產錢官未各有歸著自無依寄之擾本州又已出榜勸諭人戶陷殺象獸約束官司不得追取牙齒蹄角今更別立賞錢三十貫如有人戶殺得象者前來請賞即時支給庶幾去除災害民

樂耕耘有欲陳請荒田之人即仰前來陳狀切待  
勘會給付永為己業仍依條制與免三年租稅

一今來朝廷推行經界本為富家多置田業不受租  
產貧民業去產存枉被追擾所以打量步畝從實  
均攤即無增添分文升合雖是應役人戶日下不  
免小勞然實為子孫永遠無窮之利其打量紐算  
之法亦甚簡易昨來已印行曉示今日又躬親按  
試要使民戶人人習熟秋成之後依此打量不過

一兩月間即便了畢想見貧民無不歡喜只恐豪富作弊之家見其不利於己必須撰造語言妄有扇搖令仰深恩彼此一等皆是王民豈可自家買田收穀却令他人空頭納稅非惟官法不容亦恐別招陰譴不須如此計較生事沮撓良法

一本州節次行下諸縣不得差人下鄉乞覓揜擾科敷抑配強買物色及以補發經總制錢發納上供銀罷科茶等為名科罰人戶錢物所以上體朝廷

寬卹之意欲使民得安居不廢農業今恐諸縣奉行違戾仰被擾人指定實迹前來陳訴切待追究重作行遣

一本州節次印給榜文勸諭人戶莫非孝弟忠信禮義廉耻之意今恐人戶未能遍知別具節畧連粘在前請諸父老常為解說使後生子弟知所遵守去惡從善取是舍非愛惜體膚保守家業子孫或有美質即遣上學讀書學道修身興起門戶

右今出榜散行曉諭外更請父老各以此意勸率鄉閭  
教戒子弟務令通曉毋致違犯紹熙三年二月日榜

龍巖縣勸諭榜

具官

當職恭奉勅命來守此邦見本州四縣龍谿諸邑風  
俗醇厚少有公事干撓州府獨有龍巖一縣地僻山  
深無海鄉魚鹽之利其民生理貧薄作業辛苦州府  
既遠情意不通縣道公吏又不究心拊摩躬行教化



往往多差公人下鄉搔擾及縱吏人因事乞覓不  
遵朝制不惜刑獄不能分別是非曲直致使其民  
不見禮義惟務凶狠强者欺弱壯者凌衰內則不  
知有親戚骨肉之恩外則不知有閭里往來之好  
習俗薄惡已足歎傷至其甚者則又輕侮官司公  
肆咆哮把持告訐無所不至始則詭名下狀終則  
將身藏閃及至州縣察其欺詐追捕緊急則便閉  
門聚衆持杖鬪敵殊不思量既為王民便當遵守

王法州縣之官皆是奉行朝廷政令今既不然抗  
拒州縣便是不遵王法不畏朝廷如此所為何異  
盜賊縱使一時抵敵得過不知終久作何收殺雖  
說本因官吏養成此惡然却終須自己出頭受罪  
小者徒配決罰大者殺身破家赤子無知抵冒至  
此良可悲憫當職既忝父母之官豈忍坐視不思  
有以救其未然除已行下龍巖縣約束官吏務宣  
教化恪守條法不得似前容縱搔擾外須至曉諭

右今榜龍巖縣管下通行曉諭上戶豪民各仰知悉其  
有細民不識文字未能通曉即請鄉曲長上詳此曲折  
常切訓誨要使闔縣之人常切思念既為王民當守王  
法自今以後各修本業莫作姦盜莫恣飲博莫相鬪打  
莫相論訴莫相侵奪莫相瞞昧愛身忍事畏懼官司不  
可似前咆哮告訐抵拒追呼倚靠凶狠冒犯刑憲庶幾  
一變獷悍之俗復為禮義之鄉子子孫孫永陶聖化如  
更不改尚習前非州郡雖欲曲法相容亦不可得決當

會合巡尉圍掩搜捉依條斷罪的無輕恕今榜曉諭各請詳思超早革心無貽後悔

潭州委教授措置嶽麓書院牒

契勘本州州學之外復置嶽麓書院本為有志之士不遠千里求師取友至於是邦者無所棲泊以為優游肄業之地故前帥樞密忠肅劉公特因舊基復創新館延請故本司侍講張公先生往來其間使四方來學之士得以傳道授業解惑焉此意甚遠非世俗常見所到也

而比年以來師道陵夷講論廢息士氣不振議者惜之  
當職叨冒假守蒙被訓詞深以講學教人之務為寄顧  
恨庸鄙弗克奉承到官兩月又困簿書未能一往謁殿  
升堂延見諸生詢考所合罷行事件庶革流弊以還舊  
規除已請到醴陵黎君貢士充講書職事與學錄鄭貢  
士同行措置外今議別置額外學生十員以處四方遊  
學之士依州學則例日破米一升四合錢六十文更不  
補試聽候當職考察搜訪徑行撥入者庶幾有以上廣

聖朝教育人才之意凡使為學者知所當務不專在於區區課試之間實非小補牒教授及帖書院照會施行仍請一面指揮合千人排備齋舍几案床榻之屬并帖錢糧官於本州贍學料次錢及書院學糧內通融支給須至行遣

約束榜

一契勘諸縣民訟人戶自合從條次第經陳具公事各有條限民戶越訴亦有斷罪刑名往往縣道不能結

絕遂致留滯引惹詞訴兼又有人不候本縣照限追  
會圓備予決便即先行經州秦煩官府今立限約束  
自截日為始應諸縣有人戶已訴未獲盜賊限一月  
鬪毆折傷連保辜通五十日婚田之類限兩月須管  
結絕行下諸縣遵從外如尚有似此民訟亦照今來  
日限予決若縣道違期不行結絕方許人戶赴州陳  
訴切待先追承行人勘斷再立限驅催其縣道又不  
了絕致人戶再有詞訴定追押錄科斷外今仰民戶

經由書鋪依式書狀仍於狀內分明聲說的於某年  
月日經縣陳訴已經幾日本縣不結絕以憑行遣如  
不明注經縣月日或不候限滿妄稱已過所立日限  
陳述致追承行人到州見得元經月日未及其人戶  
連書鋪並行收坐仍毀劈書鋪名印若經本州一月  
未滿狀詞亦不許再行

一官人進士僧道公人

謂訴已事無以次入聽自陳

聽親書狀自餘

民戶並各就書鋪寫狀投陳如書鋪不寫本情或非



理邀阻許當廳執覆

一本云或非理飾說及當廳執覆不同所詞定行根究書鋪

一狀詞並直述事情不得繁詞帶論二事仍言詞不得過二百字一名不得聽兩狀並大字依式真謹書寫如有干照契据并未盡因依聽錄白連粘狀前

一如告論不干已事寫狀書鋪與民戶一等科罪

一民戶詞訴不應為狀首人自不當出名其應為狀首人並要正身如實有事故得用以次人仍聲說因依年月若干有無疾蔭婦人有無疾蔭娠孕於前從實

開具或有罪應科決臨時妄行供說先契勘元寫狀  
書鋪

一書鋪如敢違犯本州約束或與人戶寫狀不用印子  
使令經陳紊煩官司除科罪外並追毀所給印子

一人戶陳狀本州給印子面付茶食人開雕並經茶食  
人保識方聽下狀以備追呼若人戶理涉虛妄其犯  
人并書鋪茶食人一例科罪

一契勘人戶多有不問事節緊慢不候行押詞狀日分

輒行攔轎下狀或投白紙今立約束攔轎狀詞並不  
受接並所投白紙止是理訴婚田債負即非緊切利  
害事件亦非貧窶鰥寡孤獨無告之人顯無忌憚紊  
煩官府自今後除貧窶老病幼小寡婦或被劫盜并  
鬪毆殺傷事干人命初詞許於放詞狀日投白紙外  
自餘理訴婚田債負或一時互爭等事入戶須管經  
由書鋪依式書狀聽引狀日分陳理如有似此違約  
束之人定當重行斷罪

一引押狀詞日分預批厯請台判輪委職官一員或兩員就大廳側畔用硃劃號數監用朱批事因

一引押詞狀除初經州狀外其有事祖狀並各令案吏貼擇出案祖用硃批出緊要情由元詞月日作如何施行某處已未結絕事因請判

一本州鼓角樓所有牌二面內東畔一面係軍州官下馬牌西面係人戶詞訟牌蒙安撫到任移西畔詞訟牌於東自新開雕屈牌一面安在詞訟牌之上差使

臣一員監當并置厯一道付監管官如有投牌之人抄上姓名押赴使府出頭取候台旨施行其牌黑漆雕字具說有實負屈緊急事件之人仰於此牌下跪立仰監牌使臣即時收領出頭切待施行如敢將閒慢事件不候引狀日分妄作緊急坐牌定行勘斷

一有日逐諸雜申并省符公牒文字並置簿子劃隔眼拘管遇夜銷逐旬委官點號

一照得日逐所受入匣追索人案文字置外引開排時

刻責鋪兵依限走傳如違限委官先追押錄重斷

一類狀名色官吏受財枉法將吏侵尅役使殺人行劫  
殺畧姦盜聚眾鬪打或抵拒官司豪家大姓侵擾占  
奪細民田業姦污婦女鬪打見血官員士人公人軍  
人僧道執狀已上當使廳引押訴婚田地訴分析訴  
債負鬪打不見血差役陂塘已上都廳引押

一引押詞狀元係雙日引押公事元係隻日蒙安撫到  
任以隻日引押詞狀雙日引押公事

一狀式某縣某鄉某里姓名一年幾歲有無疾蔭合為  
狀首堪任杖責係第幾狀一所訴某事合經潭州一  
即不是代名虛妄無理越訴或隱匿前狀如違甘伏  
斷罪號令右某

入事明注年月指涉某  
入某事盡實限二百字

須至具狀披

陳伏候判府安撫修撰特賜台旨

一照對每月長沙等一十二縣合解有無定額月椿等  
錢從本司印格目書填錢物監轄典吏椿辦限次日  
各分日限申解赴州交納近準安撫殿撰侍講到任

措置逐月輪委佐官坐押內長沙善化縣輪縣丞主簿縣尉并外十縣輪縣丞主簿監當官一員監轄典押承行人各一名拘椿並限次月初十日到州其錢須要所委官同典吏躬親坐押赴州如解足典押免行到州不足斷訖典吏就州監催或錢違限不到即追本縣椿錢典吏及拘押錢官下承行廳子併行勘斷施行

一項照應州場日逐受納紹熙五年夏稅錢將入中限



未据人戶賫納竊恐有悞裝網支用檢準令節文諸  
稅租入中限聽追戶頭或以次家人科較品官之家  
追幹人令曉示人戶及早盡數赴州送納如違定當  
從條點追赴州科較監納施行

一項照應湘潭衡山湘鄉瀏陽攸縣五縣拖欠紹熙四  
年秋稅逐將錢差官下縣受納近緣天時亢旱祈禱  
未應恐人戶艱於送納已自七月初五日帖所委官  
回州取稟候小熟日却去開場受納去訖竊慮鄉民

未能遍知仍前追擾合行曉諭今印小榜下縣鄉村  
曉諭人戶各宜安心車水灌溉田畝準備合納稅錢  
候得雨水熟日依舊差官到彼開場即行送納各令  
知悉

一項照對稅務日逐收到牙客人合納河市稅錢並不  
盡數拘解竊慮本務合干人作弊收錢隱瞞入已合  
行約束使司今置板榜務門粘貼本務日逐申收到  
牙客人錢數曉示通知如本務收稅錢多申到數少

不同隱瞞官錢入已許牙客人具狀告首若客人稅物多供申少亦許同伴人陳首切待追人送獄根勘依條斷罪追賞錢五十貫文各令知悉

一訪聞諸司案及倉場庫務諸官廳下擅自存留曾經斷罷及私名之人在逐處抄寫文字合行約束今立賞錢一百貫文府衙門許人指實陳告切待追究將犯人重斷每名追賞錢一百貫文其本處存留人一例斷罪施行

一照對諸縣弓手土軍係專一教閱以備彈壓捕盜本州已節次督責巡尉依時教閱務要武藝精熟仍月具所教人數姓名陞加武藝帳狀申州以憑逐月三分點一赴州按教行下諸縣併各縣巡尉各仰速便先行聲說弓手土軍姓名年甲所習武藝文籍供申仍於籍內便將弓兵分作三番自今年七月十九日為始先要第一番所發弓手齊集到州按教須是向後月十九日以前解發到州應期諸縣合教

一契勘諸軍武藝最是弓弩可用近下諸縣點喚弓手  
上軍赴州按教據各處具到帳籍多是將不會武藝  
之人裝作鎗牌手名色解發委是有悞緩急便喚行  
下諸縣巡尉各日下盡將所管弓手土軍並令專習  
弓弩務要捉親射射精絕聽候點喚赴州按教仍令  
兼習人鎗小牌諸般武藝不得私役弓兵妨廢教閱  
一據客人趙堅等狀竊見民間行使砂毛錢鐵錢朝廷  
累降指揮明立法禁非不嚴切今牙鋪戶不遵約束

依前夾雜砂錢行使致得客人墜敗財本乞降賞榜於管下瀏陽湘潭醴陵衡山并下攝諸州等處約束使司已立賞錢五十貫文印給小榜發下長沙等一十二縣下張掛曉示外仍出榜都市并瀏陽湘潭醴陵衡山縣及下攝諸州等處張掛曉諭如有前項違犯之人許諸色人告捉赴官將犯人送獄從條勘斷追給上件賞錢施行

一契勘諸廂收領公事多是在廂經日不行申解却令

兩辭和對更不申官委是有違條法遂符行下諸廂  
兵官自今後應有公事即時具狀申解赴府出頭不  
得隔宿及妄作休和申州如違將當行人重斷廂官  
別有施行

一契勘本州累次出榜立賞錢三十貫文禁止百姓及  
軍人賭博仍拆毀櫃坊並告報諸營寨廂官及遍牒  
在城諸官廳常切覺察鈴束非不嚴切今來尚有不  
畏公法之人依前開櫃坊停止軍兵百姓公然賭博

全無忌憚廂巡察縱兵官亦不鈐束深屬不便出榜  
都市曉示如有前項違犯之人諸色人告捉押赴使  
府出頭切待將犯人斷罪軍人次第問當各追上件  
賞錢與告人充賞若諸廂諸廳諸營寨合千人依前  
容縱定一例追斷施行

一照應近來委送官員者詳審覆公事文字其間多有  
引用繁文除看詳公案文狀已有狀式曉諭外今再  
立委官審覆申到公事式樣請只就元狀內用小帖



子節畧事意看詳所斷指定當否今欲如何施行大抵直說事理不須繁文其狀內緊切事理別用小帖

### 子標說

小帖子式節畧狀內緊切事理

云云

某官

云云

某

今竊詳

云云

某官所斷已得允當

或云未得允當

已開具

### 出榜客位訖

一訪聞街市逐時有不逞之徒與軍兵欺壓善良毀打百姓生事作鬧出榜都市張掛曉示如有前項違犯

之人斷罪監納先下拳錢五貫文每五日一限納錢  
三百文入官內軍兵押下所屬次第問當

一今後遍下諸縣諸官用符簽廳請判押檢職官連銜  
書押行下專下逐縣逐官用帖如常式仍先行下諸  
縣照會

一詞狀當日職官分類呈押具式呈

一詞狀帖牒下外諸縣者索案除程一日追人除程兩  
日五人以上去縣百里以上者除程三日案官鑿定

日限案吏朱批某月某日限滿申展者都廳先次類聚呈押一日者不展兩日者許一展三日者許再展再展而不到者都廳指定帖某巡尉差人追呼呈押行下

一在城差人監追公事各置印齣緊限不展次緊限許一展再展而不到者訊承差人長限日展並簽廳批

鑿不再呈押內長限每三展一押

長限如監醫之類

一當限文字並午牌以前到午後即是違限不得收接

如違申舉

一符牌申狀到事有常式事如盜賊發露當催捕判回  
申當催申抄劄口詞檢驗屍首當差官及官員陳乞  
批書之類並即時押訖送所屬案分行遣請判行下  
如無施行事類聚判照有祖及施行未到即簽廳擬呈  
一簽廳告報諸縣諸官廳大字書寫文狀須如中指面  
大即擬貼述大槩却於狀內抹出緊要情節便見曲  
折不然又須書寫一過枉費工夫

一三獄直日開拆司先次呈押餘案抽牌押文字訖退  
不得再上如有未了文字都吏次早揀牌入筒取覆

抽押內戶刑案事繁  
許次早呈押

一都簽廳申四項奉台判後三項修入見行約束

一照對日逐諸案銷生事號簿蒙約束遇九日銷對竊  
慮積壓今乞次日委官點對逐一批銷書絕乞候九  
日呈點

一照對人戶役白紙止為有瞭切事干人命劫盜等今

來受狀不問事理輕重有白紙三四十紙訪聞皆是書鋪邀求致令投陳紊煩官司今乞告示書鋪如是準前邀阻人戶致使府問得投白紙人曾經書鋪不為寫狀之人乞賜喚上斷治施行不應受理即行擇退

一準台判索案除程一日追人除程兩日五人以上在縣百里以上者除程三日不到帖巡尉追人一日者不展今欲乞再展一限兩日者許一展今欲再展一

限通三限三日者許再展亦通三限

一照應近據諸縣申到人戶理訴婚田債負皆稱目今正是青黃不接之際告示候務開日施行使司契勘人戶互訴婚田爭地多是有力上戶之家占據他人物業或是遷延不肯交錢退贖或是抗拒不伏赴官理對只要拖延衮入務限使下戶被苦無能結絕檢準律令諸婚田入務若先有文案交相侵奪者不在此例況今本州多是畝田只有早稻收成之後農家

便自無事可以出入理對在田亦少施工未獲之利  
自可退業以還有理之家諸縣爭論田地詞訴可以  
承行理對不必須候十月使司已於六月十八日符  
長沙等一十三縣遵守施行訖

一照應本州近於七月十七日準登寶位赦書內一項  
應官司房廊白地貨錢並放至紹熙四年終已出榜  
都市曉示去訖今訪聞得街市有賃屋居民都有安  
稱合從赦書到日之後納起致有爭競州司契勘前



項赦書即無放至紹熙五年正月以後房錢之文或有屋主自願饒潤即從其便若屋主不願饒潤即其賃屋人自合遵從大赦指揮印還不得妄有抵負扇惑生事使司已於七月二十六日出榜都市曉示訖

一契勘本州州學之外復置嶽麓書院

云云並同前委教授牒

一照對本州所管上丁釋奠及祭祀社稷三獻官祭服緣製造年深各並不如法式今欲別行製造初獻六旒冕亞獻四旒冕終獻無旒冕及本等衣裳大帶中

單綬佩筓膝革帶履鞮各一副竊恐只依印本製造  
未必盡合禮制申行在太常寺闕借上祭服每事一  
件付進奏官楊思恭同本州差去客司楊暹就臨安  
府製造同州行用

一伏覩紹熙五年七月七日赦書內一項五嶽四瀆名  
山大川歷代帝王忠臣烈士載於祀典者委所在長  
吏精潔致祭近祀廟處並禁樵採如祠廟損壞令本  
州支係省錢修葺謹按晉書南中郎將湘州刺史譙

國司馬王諱承當王厚作亂之際興兵唱義為國討  
賊功雖不就志節可嘉今數百年未有廟貌又按長  
沙圖誌故通判州軍事贈直龍圖閣孟公諱彥卿通  
判州事贈直龍圖閣趙公諱民彥將官贈武節大夫  
劉公諱玠兵官贈右監門衛將軍趙公諱津之皆以  
紹興初年金人侵犯或提兵出戰或率衆守城殉國  
捐軀忠節顯著本州從來只於南嶽行宮設位祭享  
祠象不立無以慰答忠魂表勸節義今準前項赦書

合於城隍廟別置一堂塑像奉安永遠崇奉其譙王  
長史虞理司馬虞望參軍韓階主簿周崎鄧騫並是  
當時協謀起義之人亦各合行朔主像配神從食牒州  
委官討論計度塑造

一準紹熙五年七月七日敕書一項五岳四瀆名山大  
川歷代帝王忠臣烈士載於祀典者委所在長吏精  
潔致祭近祠廟處並禁樵牧如祠廟損壞令本州支  
係省錢修葺州司契勘東晉王敦之亂湘州刺史譙

國王承起兵討賊不克而死及紹興初年金人稱兵  
潭州通判孟彥卿趙民彥將官劉玠兵官趙津之皆  
以忠節沒於王事從前未有廟貌州司今來遵奉赦  
書指揮見行相度創立祠堂塑造神像除晉朝寇服  
別行討論外所有孟趙兩通判係贈直龍圖閣劉將  
官係贈武節大夫趙兵官係贈右監門衛將軍未悉  
本品朝服合作是何法制申行在太常寺仍已差人  
前去望塑小樣照詳典禮給降制度以憑製造施行

一照應本州管內南嶽衡山係國家火德興隆之地崇奉之禮極於嚴肅合行封植以壯形勢近來官司失於守護致得諸色等人妄行斫伐林木推殘土石破碎無以保國威靈停滯雲氣慰一方瞻仰歸依之望事屬不便契勘其地並屬寺觀所管即與民間無相干涉理宜措置今帖合同李修職躬親前去體究相度勒本縣巡尉責本寺觀主首標識簽押除深山人所不見之處許令依舊開墾種植外其山面瞻望所

及即不得似前更行斫伐開墾向後逐年深冬即令  
寺觀各隨界分多取小木連本栽培以時澆灌務令  
青活庶幾數年之後山勢崇深永為福地并帖巡尉  
仰詳前項事理須管同合同李修職前去體究相度  
逐一準此施行及出榜嶽山寺張掛約束諸色等人  
不得依前於山內瞻望所及之處斫伐林木穿毀土  
石如有前項違犯之人許諸色人於所屬陳告根究  
從條斷罪施行

一契勘目今久闕雨澤竊慮陂澤湖塘池灤灤正副長  
專意放養魚鱧之類不肯泄水注蔭致田禾乾槁深  
屬未便令曉諭陂塘湖長等人如合承水之田闕水  
即仰日下量分數放水注蔭如占吝不放之人仰食  
水人戶指實陳論追犯人重斷施行

看定文案申狀式

具位

準使帖據某人狀

或判狀即云  
使判某人狀

訴事

備錄  
全文

委某看定



或云看詳之類並依本文須至供申者

一某年月日某人狀

一某人執到某年月日契字或分開干照過多項須似此開以年月先後為次序

一檢準勅今格並同

右某竊詳上件事云云合準某勅如何定斷謹具申某處伏乞照會詳酌施行年月日具位某狀

報建陽縣審會船狀

右熹承建陽縣公文取會本家有無占破船戶姓名尋  
行契勘日前雖有顧到船隻日久不曾使用今來自合  
祇應官司差使私家即無執占之理謹具申建陽縣伏  
乞照會謹狀

晦庵集卷一百

晦菴集後序

右晦菴朱先生文集一百卷閩浙舊皆有刻本浙本洪武初取置南廳不知輯於何人今閩藩所存本則先生季子在所編也其後又有續集若干卷別集若干卷二本亦併刻之歷歲既久刊缺寢多讀者病焉成化戊子仲昭自翰林謫官南都偶得閩本公暇因取浙本校之其間詳畧微有不同如劾唐仲友數章閩本俱不載其所劾事狀世之鄙儒多以是疑先生異論紛起故悉增

入使讀者知仲友蠹政害民之實而無所惑於異論也  
其他無大關係者則仍其舊惟正其亥豕魯魚之訛而  
已歲丙申閩憲使山陰唐公質夫僉憲蘭溪章公德懋  
閱舊板磨滅日甚遂以仲昭所校本補之未及訖工而  
二公相繼去任尋復殘缺僉憲天合林公一中至慨然  
以為已任久未暇及壬寅秋乃謀於先生九世孫都轉  
運伯承君復以仲昭所校本精加讐訂訛者正之腐者  
易之缺者補之至是始無遺憾矣嗚呼先生不可復作

而是編之存可以見其經國之謀焉可以見其濟民之  
政焉可以見其出處之義焉可以見其交際之道焉上  
而天道之妙下而物理之微明而禮樂之文幽而鬼神  
之理大而人倫之常小而人事之變無所不該誠作聖  
之階梯入道之門戶也諸公拳拳相與圖其永久其嘉  
惠後學之意不既深乎工既告成仲昭謹識其顛末且  
以告於後之君子俾謹守而嗣修之以無替諸公之惠  
也成化十九年歲在癸卯二月之朔後學莆田黃仲昭

識

晦菴集後序

右晦菴文公文集百卷又續集五卷別集七卷歲久版  
昏察使胡仲申岳副使張用載大輪先後白巡御史虞  
惟明守愚蘓宗玉信蔣伯宣詔縮費重雕藏諸閩臬潢  
故習朱氏易詩四書想見其為人比涉是編始得公所  
為融會折衷深造大成者審在沉潛反覆積累有年之  
後而師友淵源經綸本末始終條理燦然詳明尤足以  
發揮本義集註語錄曲折上探聖賢之蘊雖公於文所

好不存潢以世傳大學序白鹿洞賦草暨答呂伯恭論  
洞記等徵之當時思繹之熟改定之精凡未可以言語  
文字求之也獨慨公老慶元間學禁方厲片詞隻字所  
在毀棄每讀詹師罷鉅梓書未嘗不掩卷太息惡小人  
之罔極淳祐以來區區掇拾已非復公季子在初類次  
本而王會之祀伯和虞伯生家藏與陸王帖梅花賦諸  
篇往往尚逸弗錄集中記載抵牾可疑亦復不鮮則吾  
儕於此苟非誠致力於公居敬窮理反躬實踐之功效



恐其幸傳者未易遽知况望能并其不可傳者不言而自得之哉潢間往者濂洛三先生書歷時未遠微言大義鬱而不彰公既以孔孟道統所繫亟為之緒正表章猶慮人滯於見聞謂必能真立伊尹之志修顏子之學使本立而知益明知精而本益固日用之間將有以得乎先生之心而疑信可判繼往開來惓惓如是矧後公數百年其間志堅思苦謹守精翫如勉齋北山儒者僅有乎爾寧不重感於斯文嘉靖壬辰秋七月甲戌後學

發源潘潢拜書

